

Ngaguar Ma'na, Nyungsi Harti Toponimi Masarakat Sunda

Dede Kosasih*

Purwawacana

Toponimi ditilik tina jihat etimologis asal tina topo nu hartina tempat jeung nimi nu hartina ngaran. Jadi, sacara terminologis toponimi téh ngandung harti panataan ngaran-ngaran patempanan.

Nurutkeun kajian *folklore*, toponimi téh séké sélér tina élmu onomastika (onomastics), anu ulikanana ngawengku di antarana baé: méré ngaran jalan, ngaran atawa jujuluk jalma, ngaran kadaharan, ngaran bubuhan kaasup asal-usul (legénda) ngaran hiji tempat dumasar kana 'sajarah' ngajanggélékna.

Nataan ngaran tempat tangtu bakal loba rambat kamaléna lantaran ngajujut ngaran tempat mah teu cumpon ku nyawang ngan tina salah sahiji aspek baé. Nya sawadina kudu dijujut deuih rupa-rupa informasi nu nyampak disatukangeun kaayaan éta tempat. Kumaha pakuat-pakaitna antara ngaran tempat jeung éta informasi? Ilustrasi di handap saeutikna baris méré gambaran anu écés.

Lamun urang kabeneran ngalakukeun perjalanan ti Subang rék ka Bandungkeun urang tangtu bakal ngaliwatan *Tanjakan Émén*. Éta tempat téh pernahna di kebon entéh, méméh gerbang Tangkuban Parahu. Mun dititenan éta ngaran tempat téh ngandung sababaraha informasi. *Kahiji*, pangna disebutkeun Tanjakan Émén nurutkeun *setting fisikal* (géomorfologis atawa kontur permukaan bumi) lantaran éta jalan téh nanjak (nanjeur). Kadua, di éta tanjakan téh nurutkeun *setting sosial*, cék sakaol mah (kira-kira taun 70-an) kungsi aya kajadian nu matak geunjleung. Di éta tempat, kungsi aya supir ompréngan Bandung-Subang cilaka, ngan duka alatan tabrakan duka tigebrus, nepi ka maotna. Ngaranna Émén. Ari cék mitos (*setting kultural*), lamun nu rék ngaliwatan ka éta tempat kudu ngalungkeun roko ngarah salamet.

Kasus-kasus modél kitu téh bisa baé kapanggih di unggal tempat. Tina rupa-rupa informasi nu diébréhkeun dina ilustrasi téh tépéla ngaran tempat téh ngurung kana aspek-aspek *fisikal, sosial* jeung *kultural* ngeunaan éta tempat.

Cindekna, ngaran patempanan téh bisa baé ngarepresentasikeun kaayaan nu sabenerna. Najan dina émpronan mah mungguh éta ngaran téh teu parok jeung kaayaan nu sabenerna. Parandéné kitu, éta ma'na nu dikandung téh da esensi nu sabenerna lain ngan ukur sakadar artikulasi.

Aspek jeung Pola Toponimi

(1) Aspek Fisikal

Geus jadi kudrat, kangaraning manusa éstu gumulung jeung lemburna, suméndér kana alam sabudereunana.

Aworna manusa jeung lingkunganana téh tépéla lain ngan pikeun nyumponan pangabutuhna wungkul, tapi pikeun maliré jeung makihikeun éta lingkungan deuih, nu nétlakeun yén manusa téh bagian tina lingkungan. Pon kitu deui mun disawang tina jihat séjenna, lingkungan sabudereunana téh bagian tina dirina. Ku kamotékaranana, manusa téh diperedih sangkan milu masieup lingkunganana.

Kamampuh manusa pikeun makihikeun jeung ngaropéa lingkungan téh ngindung kana kabudayaan nu dipibandana. Malah bisa disebutkeun, manusa, kabudayaan jeung lingkungan téh éstuning gumulung, dalit lir gula jeung amisna. Mun cék Slotkin téa mah “the organism and its environment must be suited to each other”. Jadi, tétéla hubungan silih untungkeun (symbiosis mutualisme) ti antara manusa jeung alam sabudereunana téh pohara perluna. Cindekna, sangkan mahluk hirup bisa tetep renggenek minangka bagian integral tina lingkunganana, tinangtu kudu bisa nyaluyukeun dirina jeung lingkunganana.

Urang Sunda (baheula) téh éstu gumulung jeung lemburna, suméndér kana alam sabudereunana. Mun dijujut, di urang (Tatar Sunda) teu saeutik ngaran tempat nu diasosiasikeun jeung rupa-rupa fenoména alam (setting fisikal) nu nyampak jeung pernah aya. Demi fenomena alam téh bisa ngawengku aspék hidrologis, aspék Géomorfologis (kontur permukaan taneuh) jeung aspék biologis. Lian ti éta, aya 2 rupa pola nu maneuh raket jeung asosiasi, biasana ku cara matalikeun ngaran tempat jeung fenoména alam téa.

Éta pola téh bisa dicirian ku: kahiji, pola linier nyaéta ngaran tempat sacara langsung diadaptasi tina fenomena alam. Ari nu dimaksud pola nu kadua; pola barung nyaéta ngaran tempat nu dicokot tina dua atawa leuwih fenomena alam nu digumulungkeun jadi hiji ngaran (konsép).

a. Unsur Hidrologis

Ngaran patempatan nu ngindung kana aspék hidrologis di urang mah teu wudu beungharna. Nginjeum istilah Karl A. Wittfogel (urang Jerman), urang Sunda téh kakolomkeun kana hydrolic society, nyaéta masarakat nu teu leupas tina cai. Ari kituna mah geus pada-pada maphum yén tanah Sunda téh cenah kawentar daerah nu subur ma'mur. Ari salasahiji ciri suburna taneuh téh nyaéta ku cur-corna cai. Dina taun 70-an MAW Brouwer kungsi ngasongkeun statemen cenah diciptakeunana Tatar Sunda ku Gusti Alloh téh ngadamelna ogé bari “marahmay, tur imut ngagelenyu”.

Aspek hidrologis nu patali jeung dina pola linier, ngaran *Andir* upamana. Éta kecap téh seuhseuhanana mah kalawan torojogan diadaptasi tina talajak alam aspék hidrologis, anu saharti jeung huluwutan (springs), séqué atawa cinyusu. Nu matak di urang dipikawanoh istilah ngandir nu hartina néang cai. Conto nu pakait jeung aspek hidrologis séjénna: Coblong/Ledeng, Empang, Parigi, Dano, Bendungan; Léngkong; Parung; Dermaga, Parakan, Bojong, Talaga, Brebes, Sérang, Ranca(h), Setu (Situ), Empang, Babakan, Bantar/Parung, Balongan, Léngkong, Karéés, Bubulak, Sodong(Sédong), Parigi, Sagara (Jagara) jsté.

Demi aspek hidrologis nu patali jeung pola barung, lantaran gabungan téa tina dua aspek atawa leuwih (aspek hidrologis jeung aspék séjén kaasup rupaning istilah) di antarana: ci(cai): Ci-malaka; séqué: Sékéloa; leuwi: Leuwidaun; curug: Curugsigay; bantar: Bantarmara; muara: Muararajeun; balong: Balonggedé; sawah: Sawahkurung; parakan: Parakansaat; situ: Situksan; empang: Émpangsari; solokan: Solokanjeruk; kali: Kalipucang; karang: Karangnini; ranca/rawa: Rancapurut, Rawa- badak; sagara: Sagaraanakan; sumur: Sumurbarang; talaga: Talagawarna; tambak: Tambaksari; parigi: Parigmulya jrrd.

b. Unsur Géomorfologis

Lian ti aspek hidrologis, ngaran tempat téh sok dipatalikeun ogé jeung aspek Géomorfologis (dumasar kana kontur permukaan bumi) deuih. Ari pola linier nu patali jeung aspek Géomorfologis di antarana: Punclut/Penclut, Tegal, Genténg, Karéés, Lebak, Legok, Lampung, Punclut/Ponclot, Talun (kebon tatangkalan), Tajur (kebon bubuhan), jsté.

Sedengkeun nu ngindung kana pola barung, *Lemah Neundeut*, upamana. Éta ngaran téh diadaptasi tina kaayaan lemah (taneuh) anu neundeut akibat ayana rohang di jero taneuh anu kosong (tékonik) nu ahirna ngareunteutkeun struktur taneuh. Conto-conto séjénna ngaran tempat nu diadaptasi tina aspek Géomorfologis nu ngindung kana pola nu kadua, upamana baé:

tina kecap tegal jadi ngaran *Tegalkalong*; kebon: *Kebonjukut*; cadas: *Cadasngampar*; pasir: *Pasirjati*; batu: *Baturéok*; guha: *Guhapawon*; legok: *Legokhuni*; bojong: *Bojongmérón*; ujung: *Ujungkulon*; geger: *Gegerkalong*; tanjung: *Tanjungsari*; pulo: *Pulomajeti*; péngkolan, *Pengkolan Asem*, tanjakan; *Tanjakan Émén*, lebak: *Lebaksiuh* jrrd.

Kasus nu spésifik, deskripsi ngaran tempat nu patali jeung aspek Géomorfologis bakal leubeut kapanggih di daerah pakidulan Tatar Sunda nu manjang ka tebéh wétan. Éta tempat téh mangrupa kawasan pagunungan anu katelah Southern Mountains, nu nuduhkeun hiji daerah pagunungan (non vulkanik). Tina kontur taneuh modél kitu munasabah mun di éta tempat loba nu dicokot tina talajak alam. Kota Tasikmalaya, apan salah sahiji cirina loba ngaran tempat nu maké ngaran gunung, nepi ka sohor ku jujuluk the ten thousand hill of Tasikmalaya. Kesan pernah ayana talajak alam modél kitu téh bisa diidentifikasi ngaliwatan ngaran tempat nu maké kecap gunung. Upamana bagian wilayah kota nu dibéré ngaran: *Gunung Sabeulah*, *Gunung Lipung*, *Gunungroay*, *Gunung Sari*, *Gunung Gadog*, *Gunung Péréng*, *Gunung awi*, *Gunung Jambé*, *Gunung Putat*, *Gunung Ki-Cau*, *Gunung Pongpok* jrrd.

c. Unsur Biologis

Panataan tempat nu patali jeung aspek biologis sok dipatalikeun jeung lingkungan alam (sistem écologis) nu aya di sabudeureunnana. Ngaran tempat biasana dicirian atawa ngarujuk kana aspek flora jeung fauna.

- Flora

Aspek flora dirujuk ku tangkal atawa tutuwuhan nu aya atawa nu kungsi hirup di éta tempat. Aspek biologis dina wangan flora nu patali jeung pola linier, Kosambi upamana. Mungkin baé éta tempat téh harita mah can boga ngaran. Pikeun kapentingan nuduhkeun éta tempat, kabeneran deuih di dinya téh aya tangkal kosambi nya tuluy ditarelah baé ngaran Kosambi, malah nepi ka ayeuna. Di tatar Sunda bawirasa asa loba pisan ngaran tempat nu maké ngaran tutuwuhan/tangkal tina pola linier. Ngaran-ngaranna, saperti: *Ambit*, *Balingbing*, *Baros*, *Bayongbong*, *Bencoy*, *Benda*, *Bibbul*, *Binjai*, *Binong*, *Bintaro*, *Bogor*, *Bugel*, *Bunar*, *Bungbulang*, *Bungur*, *Calingcing*, *Campaka*, *Cangkring*, *Cangkuang* (*Sejenis Pandan*), *Caringin*, *Cariu*, *Cemara*, *Cempaka*, *Coklat*, *Dangeur*, *Darangdan*, *Dukuh*, *Gadog*, *Gambir*; *Gandasoli*; *Garut*, *Gebang*, *Gempol*; *Gintung*, *Godobos*, *Gombong*, *Gorda(h)*, *Hanja*, *Haramay*, *Jamblang*, *Jambu*, *Jampang*, *Jati*, *Jayanti*, *Jingkang*, *Junti*, *Kamal*, *Kareumbi*, *Katapang*, *Kawista*, *Kedawung*, *Kirisik*, *Koja*, *Kondang*, *Kopo*, *Kosar*, *Kranji*, *Kroya*, *Lembang*, *Loa*, *Maja*, *Manglid*, *Menteng*, *Palasari*, *Paséh*, *Pedes*, *Petir*, *Rambutan*, *Sadang*, *Sawit*, *Semanggi*, *Sentul*, *Soklat*, *Surian* (*Suren*), *Takokak*, *Tanjung*, *Warakas*. Jrrd.

Demi aspek flora nu patali jeung pola barung, nyaeta: *Haurkonéng*, *Kadu Pandak*, *Buahdua*, *Warudoyong*, *Kalapanunggal*, *Kasomalang*, *Kiaracondong*, *Gintunglempeng*, *Jatitujuh*, *Kawungluwuk*, *Pakuaji*, *Kadungora*, *Rengasdengklok*, *Junti Nyuat*, *Rangkas Bitung*, *Kiara Eunyeuh*, *Kadu Dampit* jrrd. Kaasup ngaran tempat séjenna, *Dungusmaung* (dungus atawa rungkun; maung). Leuweungiis (leuweung; tiis (aspék klimatologis)), jrrd.

- Fauna

Aspek fauna (sato) nu kapanggih dina toponimi pola linier mah kaitung kurang atawa teu produktif, contona: *Sanca*, *Betok*, *Tambun*, *Merak*, *Pacét*, *Tomang*, *Blanakan*. Pola barung dina ieu aspek baris kapanggih: *Cimaung*, *Rawalélé*, *Rancabadak* jrrd.

(2) Aspék Sosial

Ngaran tempat nu dicokot tina aspek sosial? Ngaran Banceuy (lebah alun-alun Bandung beulah kalér) upamana. Banceuy téh sacara étimologis ngabogaan harti kompléks kuda, kaasup istal jeung nu ngurusna. Ieu patempatan téh gelarna sabada aya jalan raya pos (Grote Postweg) nu ngembat ti

Anyer ka Panarukan téa. Ieu Banceuy téh sok dipaké tempat pangreureuhan atawa bagantina kuda pikeun kapentingan transportasi jeung kaperluan pos (pasuratan) harita. Mun aya surat atawa barang ti Batawi kudu dianturkeun ka Semarang, nya tangtu baé moal kuateun mun kudu meleter kuda hiji nepi ka Semarang. Munasabah pisan upama ngaran Banceuy téh aya méh di tempat (kota) nu kaliwatan ku éta jalan.

Conto séjén, *Balubur*. Apan éta ogé teu leupas tina aspék sosial jaman pangawulaan. Harita balubur téh ngaran tempat aya dina kakawasaan bupati (boga hak istiméwa). Mun cara ayeuna mah meureun sarua jeung kompléks perumahan pejabat (para menak) kabupatén. Conto séjénna nu patali jaman pangawulaan: *Patrol, Karéés, Régol, Pamager sari, Pungkur* jsté.

- Ngaran tempat nu patali jeung ngaran patukangan : *Sayang, Gending, Gosali, Panday, Maranggi, Palédang, Kamasan, Kaléktoran*
- Ngaran tempat nu patali jeung lembur : *Tarikolot, Babakan, Mandala*
- Ngaran tempat nu pakait jeung patali marga : *Kereteg, Rawayan, Cukang (Kawung, Awi), Érétan* jsté.
- Ngaran tempat nu patali jeung personal : *Komsén, Mahmud, Halim, Husén, Asep Berlian, Siti Munigar jrrd.*
- Ngaran tempat nu patali jeung kagiatan ekonomi : *Warung peti, Warung togé*
- Ngaran tempat nu patali jeung waktu : *Heubeul Isuk, Windu Janten,*
- Ngaran tempat nu patali jeung pakakas : *Tomo*
- Ngaran tempat nu patali jeung lokasi/tempat : *Pamijahan, Pakemitan, Pangepokan*

(3) Aspek Kultural

Ari sétting kultural nyaéta ngurung kana ngaran tempat nu dipatalikeun jeung unsur-unsur gagasan atawa ide saperti: aspék mitologi, folklore, sistem religi (kapercayaan) masarakatna jsté. Najan dina émprona mah dalit jeung seting sosial. Saupama ngajujut ngaran tempat, teu kakobet ku cara boh setting fisikal, boh setting sosial nya tarékah pamungkas téh maké setting kultural. Lamun loba ngaran tempat/kota di tatar Sunda nu teu bisa dijujut maké perspektif fisikal, nya wayahna kudu dibantuan ku mitologi, folklore jeung sistem kapercayaan. Majaléngka pan ngaitna téh jeung mitologi Nyi Rambut Kasih, Bandung nyantélna jeung carita legénda Sangkuriang. Sumedang jeung étimologi Insun Medal jste. Dina nyukcruk ngaran tempat, informasina téh biasana nyamuni disatukangeun budaya nu jadi bagian integral tina kahirupan masarakatna.

Nyukcruk sarsilah ngaran *Plumbon, Karapyak, Palimanan, Kediri* (di Subang) jste., mun kurang-kurangna urang teu apal kana kasangtukang budaya, tangtu bakal lebeng, bakal poékkeun. Nya cara maluruhna, kahiji ku jalan mesék éta kecap sacara étimologis; nu kadua dipatalikeun jeung aspék sosial budaya jaman harita ngeunaan éta tempat.

Ngaran tempat *Palimanan*, upamana. Naon sababna bet dingaranan Palimanan? Singhoréng aya sasakalana. Kecap Palimanan téh sacara étimologis asal kecap tina liman (Kawi) nu hartina gajah, dibéré rarangkén barung (konfiks) pa-an nu hartina tempat. Sabada dirarangkenan éta kecap ngandung harti tempat nu dicicingan ku gajah. Ceuk légéngna mah komplék gajah.

Naha maké aya gajah di éta tempat? Demi kota *Palimanan*, aya di daerah bawahana karajaan Cirebon (Sultan Cirebon). Ari Sultan téh nya raja téa. Demi nu jadi raja harita, (patalina jeung kontéks sosiokultural mitis-magis) boga anggapan yén miara gajah (satwa kalangenan) mangrupa salahsahiji kasaktén anu gedé pisan pangaruhna kana kalungguhan jeung komara éta raja. Nurutkeun B. Anderson dina seuhseuhanana tradisi pikiran politik Jawa (Sunda) kacida muhit jeung mentingkeunana kana kamampuh museurkeun kasaktén. Tah lebah miara satwa di lingkungan karaton/karajaan, dianggap bisa népakeun karakter nu sarua ka raja. Mawat gajah (salaku mitos) dipercaya bisa ngalambangkeun kaagungan, kakuatan sarta kasaktén éta raja/sultan.

Tina pedaran di luhur, katitén yén ngaran-ngaran pilemburan husus di Tatar Sunda teu sagawayah. Unggal ngaran tempat téh ngabogaan kasangtukang kasajaranan (sasakala) nu patali jeung setting fisikal, setting sosial jeung setting kultural. Nya kekecapan karuhun urang yén lembur matuh, dayeuh maneuh banjar karang pamidangan téh ninggang dina kekecrék.

Unak Anik katut Pasualan dina Toponimi

Panataan jeung mutalaah konsep toponimi, tétéla geuning lain ngan ukur nyungsi harti jeung ngaguar ma'nana éta tempat sacara fisikal baé, tapi nu leuwih jembar deui utamana urang baris apal kana rupaning informasi (sacara sosiokultur) hiji masarakat katut ajén-inajénna, saperti kasus Tanjakan Émén di luhur.

Konsep toponimi atawa panataan tempat téh bisa dijadikeun calecer atawa pituduh kumaha hiji masarakat ngaékspresikeun citra dirina (*inner world*) jeung nyumiratkeunana ka luar. Pola dina toponimi bisa dijadikeun indikator idiologis hiji masarakat, nu ngawengku ajén-inajén nu dianutna sarta kayakinan (wisdom) jeung pangaharepan (expectation) yén éta tempat téh luyu jeung tungtutan (pangharepan) masarakatna. Sakumaha nu ditétélakeun ku William R. Bascom (dina Dananjaya, 1994), yén salah sahiji fungsi folklor nu patali jeung topónimi nya éta minangka sistim proyeksi (projective system), salaku alat pikeun repleksi pangharepanana.

Dina budaya Sunda kiwari pola topónimi téh karasa beuki ngaloncéran. Topónimi nu nyampak jeung diparaké téh tara nyukcruk asbabun nuzulna atawa ma'na nu dikandungna. Nu penting ngalagena jeung éndah karasana.

Kasus kahiji, ari topónimi téh mangrupa produk folklor lisan, munasabah dina emprona dituliskeun atawa dilisankeun (da tatalépa téa) loba hal nu ngésér boh wanguanna boh ma'nana. Cideng (cihideung), Jingjingrigil (tina Jeungjingrigil), Komsén (tina Kong Séng), Légok (tina Legok) jrrd. Kadua, kawijakan pamaréntah Jawa Barat, hususna di Bandung, kurang, malah tara koordinasi heula jeung para tokoh (adat). Kawijakan pamarentah téh aya kesan sangeunahna napelkeun ngaran pahlawan dina jalan atawa kawasan. Lain teu meunang, lain ulah. Sabab da ari masarakat mah geus ngeunaheun atawa beukieun kénéh nyebut Cipaganti batan RAA. Wiranatakususmah, Saritem batan....., Pasirkaliki batan Wahid Hasyim jrrd. Ari pangabeuki atawa karesep téa kapan teu tiasa dipadungdengkeun. Sanes?

Nu pangpatalna, holna téh ti pihak pengembang perumahan (real estate), sangeunahna pisan, éta tempat téh hayoh dingaranan nu maké Indah. Apan nurutkeun ajén inajén budaya Sunda jeung nurutkeun makna léksikal ogé indah téh hartina murus atawa méncrét. Cag!

Dimuat dina *Cupumanik* No.....